

行下效。一時敦樸之風遍全國。及今帝威廉二世即位。雖亦嘗以節儉勸勉其臣下。然而奢侈之風則亦漸熾。而道德亦隨以淪落。柏林一都。為歐洲都會風俗最淫靡之地。私生子恆居全數兒童百分之二十。至於茶酒之肆。歌舞之場。達旦通宵。恣其狂樂。以巴黎視之。有遜色矣。其尤可嘆者。則高等軍界及高等社會之中。邇來盛行一種難以指名之惡俗。其為淫垢無恥。徵諸歐倫堡一案 Eulenburg Trial 而可見。彼身居警界者。於政治上之結社集會則干涉之。於藏垢納污之場。則不之禁也。即政府亦處之淡然。以為不必禁也。嗚呼。道德精神。宗教意念。至此而蕩然盡矣。

忠告中華政黨書

譯文匯報

甘永龍

歷觀以上所述。則德自俾士麥以後。外交內政。甚而至於道德。固無一不墮落也。德之治權。既操於一人。則但須有傑出者一人起而治之。固不難漸就整飭。然而此傑出者一人。果安從而得之乎。是不特論者疑之。即德意志愛國之士亦多疑之。德之愛國者。謂自千八百六十六年普魯士一敗而德以興。今欲改造德國。亦惟戰事之是祝耳。又有一部分人。則謂欲救德國。莫如推倒專制政府而重建國會政府。此所以社會民主黨之發達。乃德人所極歡迎者也。果爾。則議院與朝廷終不免起有衝突。甚且因此而動內兵。改共和。亦未可知也。德國深識之士。無不惴惴於大亂之將作。茲篇所言。不知有當乎。 (已完)

旁觀者清。斯言諒哉。當兩軍相接。血肉膏原野鎗礮震天地之時。其指揮而號令之者。非苦戰於局中之兵士。而實伺察於局外之將領也。革命時代之政略。其為混亂極矣。而其能識別強點弱點之所在。與夫存亡勝敗之勢之誰屬者。厥惟局外人。局外人之中而有表同情於某方面者。則其言足以啟局中人之惕悟。俾得於強弱之點。存亡勝敗之勢。知扶擇而定去取。記者固表同情於中華之革命者也。此茲篇之所以作也。

諸君乎。諸君固中華之政黨。而應得吾儕之稱賀者也。異族專

制之朝。以奢侈無度庸劣不職著者。諸君固已傾覆之矣。歷來腐敗之紀念。專制之毒蝕。諸君又已掃盪而廓清之矣。諸君之革命。其成也。非若法蘭西之恣意殺戮。流血千里。至今為民國玷也。諸君又未嘗有封建遺孽或其他仇敵。暫時匿居於外國。一旦挾其捲土重來之勢。足為諸君之大患也。至於中華人民向有自治之能力。歷世愈久。而自治之能力亦愈臻完美。今為共和國民。則益足以自見矣。凡此種種。均足為諸君賀者也。雖然。諸君之中。其為新時代之領袖者。多不免於年事太少。

閱歷過淺。諸君雖有少年人之肩。而實缺少老成人之頭。諸君今日所切需者。有識見之指導是也。以少年人之熱心。而濟以老成人之識見。則其勢可以無堅不破。無謀不成。不然者。其結果亦反是。諸君乎。戒之哉。勿蹈前人之覆。勿估一己之非。諸君以不嫌於專制而傾覆之。則慎毋以無政府為專制之續也。專制雖惡。然與無政府相比。則專制猶遠勝也。孰善孰惡。孰是孰非。孰智孰愚。凡世界各國所經歷者。莫不羅陳於諸君之前。諸君其慎所擇也。何也。中華之前途。實繫於諸君之一擇也。中華今日。猶孤舟之在大洋。圍繞其四周者。非礁石即流沙。而船主則已失其操縱之力。故謂之飄泊則可。謂之駕駛則不可。然此非船主之咎也。同舟員役。自相爭鬪。有以致之然也。中華今日。豈尚有所謂秩序。豈尚有所謂紀律。惟無秩序。故乃凌雜。惟無紀律。故鮮服從。中華今日之在世界。蓋正在羣雛粥粥適者生存之時代。彼希臘羅馬波斯西班牙諸國。皆嘗經此試練之時代。而大都以內部腐敗及自相離遏之故。遂不甚適於生存之公例。噫嘻。中華今日。難保無南北分離之勢。而一般人士。即非極口贊成。然亦處處之泰然。斯誠可謂大愚不靈者矣。試思南北美之戰。兄弟相殘。至四年之久。人命之死亡幾何。資財之喪失幾何。此豈吾中華民國諸君所願乎。不幸中華果有此一日。則列強決不肯袖手旁觀。至已得之利益陷於危地。於是公共之干涉以起。而瓜分之慘禍以成。此又豈諸君所願乎。法蘭西於恣意殘殺國家騷亂之後。而歐洲各國遂有聯師

進逼之舉。幸有拿破崙為軍旅之士。法以獲全。然而中華民國之拿破崙果何在。諸君將於何處求之乎。俄與日如虎狼之伺於門。此外眈眈逐逐於後者尚不一國。諸君而欲自行分裂。則是迫各國使不得不起而瓜分也。噫嘻。及今悔禍。尚有可為。撥除私見。實行團結。此在孫中山固已見及之矣。則諸君宜贊助之。蕩除猜疑之心。勿為利祿之謀。而一意以熱誠愛國為歸。中華庶尚有豸乎。

尤有至重要者。則對於言論界之限制是也。民國之主持輿論者。未嘗無真才實學之士。然亦有一二不肖者廁身其間。就其大部而言。非年事太少。閱歷太淺。即雖嘗學問而僅獲皮毛。然其於政治經驗絕無所知。則一也。惟然而放言高論以起。其所責難而希望者。可行於烏托邦。(理想之共和國)而不可見於實質世界。此等儒生。宜有以箝制之。至其鼓吹南北分離。或各省獨立。甚至有隱釀叛亂者。則宜驅之使入於戰場。使入於幼稚園。而萬不容其廁身報界。當俄日戰爭之際。日本之危迫極矣。然四境之內。并無一煽亂之新聞家。今日中華之危迫。十倍於日本當日。而新聞家之甘為奸宄不可究詰者。乃至在坑滿坑。在谷滿谷。此豈記者之過言乎。此輩不特為中華之新聞家。而實亦中華之政黨也。

是豈中華之福乎。是允宜箝制之。蓋出版自由。乃承平守法之國所藉為粉飾之具。豈中國今日所遽能實行者乎。英國、承平之國也。然而數十年前。議院僅開會一

次。而取銷保護人身律之議案因以通過。是蓋應乎時勢所急需。而中華今日。尤不能無是也。諸君乎。國事急矣。思之思之。

同胞戰爭。固俟他日。可乎。

日本大隈伯爵論中國情形

譯字林西報

陳重民

大隈伯爵近在日本報登一長論。今節譯其略曰。予已解明目下中國已有將亡之形狀。無論其得有轉機以成一強國。或將因此沉痾而不起。均與日本有絕大之關係。故中國之前途。我日人必須深為注意。中國存亡。視列強之行爲以決定。如無列強助力。中國難望建設一政府以得全國之信從也。前此吾人於新政府所望甚奢。今則轉爲失望。凡負建設責任之人。從前過於奮力。以期恢復和平。而於所以鞏固國家基礎之道。全行漏失。據此觀之。國中互相爭鬪之風。將接續不絕。而外國資本家。亦不願以金錢擲於危險之地。中國若於十數年內不大遭傾覆。實爲至幸。現所可希望者。只有借列強助力。於意外之事未至之前。以鞏固國家之基礎而已。

22261

中國幅員之大。人民之衆。欲建設一完全政府。實非易事。各行省設總督行政之制度。至前清尙未更改。總督之權限。儼然如一政治上之包攬人。此等行政方法。雖非完善。然以中國目下情形而論。實爲不可少之一法。雖新中國已宣布共和。然欲將舊法一筆抹去。以中央政府之權而治全國。勢亦有所未逮。

現在中國雖號爲民主。而行政並無實權。何如將政體改爲聯邦之爲愈乎。此項更改之法。即將總督之制。量予變通。中央政府僅留籌畫大概政策之權。其行政細章。由各省自行辦理可也。聯則強分則弱之語。自古至今。無以或易。人民於政治上聯合之力。有關於建設堅實之中國政府。實爲極要之事。中國人民。與他國人相較。無論何事。未見遜讓。且有數事。如商業上之誠實及忍耐二端。較之他國人。尤著特色。況國中又有無限未開之佳礦。及廣大之良田乎。如有良法以治理中國之人。又發達其經濟。中國之前途。誠不可量。至於列強因國際交涉之故。其於實行瓜分一事。並不欲達其計畫。現列強最關切者無他。僅欲投資以濬其天然之財富。而所最懼者。則反對達此目的之擾亂耳。然列國雖共允保守中國主權。而因他種方面之壓力。以致全國瓦解。亦不能謂爲毫無影響。歐西文化之力。愈趨愈烈。如仍欲執迷抗拒。恐無此日。列強雖欲保全中國主權。然個人之行動。雖往往釀成國際最難解決之問題。亦無法加以禁止。美國海盜之不法。實該國與墨西哥膠轕之原因。致有墨西哥